



Inatsisartut Suleriaasianni § 37, imm. 1 naapertorlugu, Naalackersuisunut imaattunik apeqquteqarpunga.

Naalackersuisunut apeqqutit:

- 1. Ulloq 1. januar 1992-mi peqqinnissaqarfiup Kalaallit Nunaannit oqartussaaffigineqalernerani ikiaroorniutit pillugit inatsisiliornissamut pisinnaatitaaffik nunatsinnit oqartussaaffigineqalerpa?**
- 2. Taamaangippat: Ikiaroorniutit pillugit nalunaarutip allanngortinneqarnera pillugu nalunaarut nr. 665, ulloq 1. juni 2018-meersoq Kalaallit Nunaanni atuuppa?**

(Inatsisartunut Ilaasortaq Peter Olsen, Inuit Ataqatigiit)

Tunngavilersuut:

Naalackersuisut § 37 naapertorlugu apeqqummik nr. 217/2019-mik akissuteqarnerminni ilaatigut imannak paasissutissiipput:

”Annerpaamik 0,2 %-imik THC-mik akullit eqqunneqarsinnaanissaannut periarfissat pillugit Naalackersuisut oqartussaasunik susassaqtunik oqaloqateqarput, tamanna akuerineqarpat cannabisip uuliai aanngajaarniutip sinnikuinik annikitsumik akullit inerteqqutaajunnaassapput. Danmark siorna akussat killissaannut tassunga assingusumik akuersissuteqarpoq.”

Annerpaamik 0,2%-mik THC-mik imaqtumik cannabisimik danskit nioqqutissiaasa inatsisit naapertorlugit pisinnaangortinneqarnera, ikiaroorniutit pillugit nalunaarutip allanngortinneqarnera pillugu nalunaarut nr. 665, ulloq 1. juni 2018-meersup atuutsilerneqarneratigut pivoq.

Nalunaarutip pineqartup aamma Kalaallit Nunaannut atuutsinneqarnissaa naatsorsuutigisinnaagaluarpara. Nalunaarummi ikiaroorniutit pillugit inatsit naapertorlugu atuutilersinneqarpoq, tassa inatsit nr. 169, ulloq 24. maj 1955-meersoq kingornalu allannguuteqartoq. Inatsisip aallaavia – tassa inatsit 1955-meersoq – aalajangersakkamik imaqarpoq, taassumalu malitsigisaanik inatsit *”sakkukinnerulersitsinerit nunap immikkoortuani immikkut inatsisit atuuttut allat naapertorlugit Kalaallit Nunaannut atuuppoq”*. Aalajangersagaq naapertorlugu atuuttussanngortitsinermi toqqammaviit pineqarsorinangillat: Matumani Kunngip peqqussutaa naapertorlugu inatsisip Kalaallit Nunaannut atuuttussanngortinneqarsinnaanera pineqanngilaq – naagga, inatsit atuutilersinneqarnermini Kalaallit Nunaanni atuuttuvoq, taamaattoq inatsimmi aalajangersakkat ilaat Kalaallit Nunaanni pinerluttaalisitsineq pillugu immikkut malittarisassat naapertorlugit paasineqartussaapput.

Inatsisip Kalaallit Nunaannut atuuttuunera pissutigalugu, nalunaarutit inatsimmi piginnaatitsissutit malitsigisaannik pilersinneqartut, nalunaarummi erseqqissumik allatut allassimasoqartinnagu

aamma Kalaallit Nunaanni atuuttariaqassapput –nalunaarummili nr. 665, ulloq 1. juni 2018-meersumi taamaattoqanngilaq.

Nalunaarutinili – Grønlandsk lovsamling 2018-meersumi nalunaarut taanna, nalunaarutilluunniit amerlasuut allat inatsit naapertorlugu atuutilersinneqartut Kalaallit Nunaannut atuutsinneqanngillat.

Ikiaroorniutit pillugit inatsisip, 1992-mi peqqinnissaqarfiup nunatsinnit oqartussaaffigineqalernerani Kalaallit Nunaannut nuunneqarnerat naassuiaataasinnaavoq.

Kalaallit Nunaanni Peqqinnissaqarfik pillugu inatsit nr. 369, ulloq 6. juni 1991-meersoq, ullorlu 1. januar 1992 atuutilersoq naapertorlugu, peqqinnissaqarfimmik oqartussaaneq Kalaallit Nunaannut nuunneqarpoq, tassani pineqartoq pillugu inatsisiliornikkut oqartussaaneq Kalaallit Nunaanni Namminersornerullutik Oqartussanut nuunneqarpoq.

Oqartussaaffimmik nuussinermi inatsimmut nassuiaatini, inatsisiliornermut pisinnaatitaaffimmik nuussineq pillugu ima makku pineqartut allassimavoq: ***”maleruagassat peqqinnissaqarfiup suliassaanut tamanut tunngasut kisimik pineqanngillat, aammali maleruagassat peqqinneq pillugu maleruagassiissut pineqarput. Piginnaatitsissummi inatsisip atuutilernerani sundhedsministeriap oqartussaaffiani atuuttuni inatsisinut tamanut tunngavoq. Oqartussaaffeqarfii ministereqarfinnut allanut attuumassuteqartut ilaatinneqanngillat.”*** (nammineq nutsigaq)

Takusinnaasakka naapertorlugit **1992 tikillugu ikiaroorniutit pillugit** inatsisit **sundhedsministeriap oqartussaaffiata ataaniipput.**

Ikiaroorniutit pillugit inatsisit ullumikkut namminersorlutik oqartussat oqartussaaffigigaat isummissagutta, tamanna pineqartoq pillugu maleruagassat oqartussaaffimmik tigusinerup (ulloq 1. januar 1992) nalaani atuuttut, uagut nammineq maleruagassiornissatta tungaanut suli atuunnerannik tamanna kinguneqassaaq (taamaaliorsimannigilagullu). Taamaammat ulloq 1. januar 1992-p kingorna inatsisinik nalunaarutinillu allannguinerit taamaallaat Danmarkimi atuupput – Kalaallillu Nunaanni atuunnatik, inatsisiliorsinnaanermummi pisinnaatitaaffik tigoreerparput.

Taamatulli isummerneq eqqortuuppat, ikiaroorniutit pillugit inatsisip allannguutai arlallit 1992-p kingorna akuersissutigineqartut, inatsisit allannguutaasa Kalaallit Nunaannut atuuttussanngortinneqarsinnaanerannik aalajangersakkanik imaqartut, isumaqanngillat. Inatsisiliorsinnaatitaanermummi pisinnaatitaaffiup Kalaallit Nunaannut nuunneqareernerani taamaaliortoqarsinnaanngilaq.

Siuliani takuneqarsinnaasutut ikiaroorniutit pillugit inatsisit nalunaarutillu sorliit qanoq iluseqarlutik nunami maani atuuttuunerat kiisalu pineqartoq pillugu inatsisiliorsinnaatitaanerup Kalaallit Nunatsinnut nuunneqarsimanera imaaliallaannarlugu paasiuminaappoq.

Apeqqutit paasinarsisitsinissaq pillugu saqqummiunneqarput.

Apeqqutit ullut suliffiusut qulit iluanni akineqarsimanissaat kissaatigaara.